



Här Fernand Etgen  
President vun der Chamber



Lëtzebuerg, den 31. Mee 2019

Här President,

Esou ewéi den Artikel 83 vum Chambersreglement et virgesäit, bieden mir Iech, dës parlamentaresch Fro un d'Madamm Ëmweltminister, den Här Minister fir d'Ekonomie an den Här Minister fir de Mëtzelstand weider ze leeden.

An der rezenter Orientéierungsdebatte iwuer d'Reduzéiere vum Plastikoffall sinn eng Rei interessant Iddien a Virschléi diskutéiert ginn.

Et muss een allerdéngs och feststellen datt verschidden Entreprisen am Land hir Wueren deels exklusiv a Plastikverpackungen ubidden, wéi z.B. eng grouss Dréinkwaasser-Entreprise aus dem Weste vum Grand-Duché.

An dësem Kontext géife mir gär folgend Froen un d'Regierung stellen:

- Deelt d'Regierung d'Meenung datt et sënnvoll wier sougenannt "Incentives" ze schafe fir eis Betriber ze motivéiere vu Plastikverpackungen op méi ökologesch Alternativen ze wiesselen?
- Wann nee, aus wat fir engem Grond?
- Wa jo, huet d'Regierung scho konkret Iddien?
- Wa scho Plastik benotzt get misst da net kloer d'Klassifikatioun vum Plastik dropstoen?
- Weieng Initiativen sin virgesin, fir och d'Geschäfte derzou ze bewegen ob di eenzel Plastikverpackungen vun Uebst, Geméis a Kaffiskichelcher ze verzichten, an Alternativen unzebidden ?

Här President, mir bieden Iech eisen déifste Respekt unzehuelen.

Françoise Hetto-Gaasch

Paul Galles

Deputéierten



LE GOUVERNEMENT  
DU GRAND-DUCHÉ DE LUXEMBOURG  
Ministère de l'Environnement, du Climat  
et du Développement durable

Luxembourg, le 18 JUIL. 2019

CHAMBRE DES DÉPUTÉS

Entrée le :

18 JUIL. 2019

Service central de législation  
Monsieur Marc Hansen  
Ministre aux Relations avec le Parlement

**Objet :** Question parlementaire 745

Monsieur le Ministre,

J'ai l'honneur de vous communiquer en annexe la réponse à la question parlementaire n°745 tout en vous priant de bien vouloir en assurer la transmission à Monsieur le Président de la Chambre des Députés.

Recevez, Monsieur le Ministre, l'expression de mes sentiments distingués.

La Ministre de l'Environnement, du Climat  
et du Développement durable,

  
Carole Dieschbourg

**Réponse commune de la Ministre de l'Environnement, du Climat et du Développement durable, du Ministre de l'Economie et du Ministre des Classes moyennes à la question parlementaire n°745 du 31 mai 2019 des honorables députés Madame Françoise Hetto-Gaasch et Monsieur Paul Galles**

**1) Deelt d'Regierung d'Meenung datt et sënnvoll wier sougenannt "Incentives" ze schafe fir eis Betriber ze motivéiere vu Plastikverpackungen op méi ökologesch Alternativen ze wiesselen?**

D'Regierung deelt d'Meenung, datt et prinzipiell néideg ass, Mesuren ze ergräifen fir den Offall ze reduzéieren. Eng Fraktioun déi do ganz kloer am Fokus steet ass déi vun den Eeweverpakungen, a ganz besonnesch déi, déi aus Plastik sinn. Hei sief drun erënnert, datt de Koalitiounsaccord virgesäit, datt Lëtzebuerg eng Virreiderroll nët nëmmen an der Offallgestioun soll spillen, mee och am Schutz vun de Ressourcen an an der Ëmsetzung vun der Economie circulaire. Zil soll et sinn, eng Null Offall Gesellschaft ze kréien. Fir dëst Zil ze erreechen ass de Ministère fir Ëmwelt, Klima a nohalteg Entwécklung amgaang eng "Null Offall Strategie" auszeschaffen. Dës Strategie wäert sech un all Acteure richten also och un d'Produzenten fir si zu méi nohaltegen Alternativen unzereegen. Heizou wäerten eng Rei vun "Incentives" néideg sinn déi op deene verschiddenen Niveauen unzesetze sinn.

Och hu vereenzelt Betriber haut schonn hir Verpackungen optimiséiert oder eng Deel-Ëmstellung vu Plastik op Kartong ëmgesat. D'Regierung ass erfreet iwwert déi positiv Reaktiounen op déi dës Pionnéiers-Projeten beim Verbraucher stoussen, well der Nofro grad souvill Opmierksamkeit muss geschenkt ginn, wéi der Offer.

**2) Wann nee, aus wat fir engem Grond?**

/

**3) Wa jo, huet d'Regierung scho konkret Iddien?**

Aktuell gi verschidde Piste gepréift déi dann esouwuel hiren Néierschlag an der "Null Offall Strategie", wéi och am Iwwerschaffe vun dem Offallgesetz an dem Gesetz iwwert Verpackungsoffäll wäerten hunn.

Dozou muss fir d'éischt un d'Prioritéit a punkto Offallgestioun erënnert ginn: d'Vermeidung. De Ministere fir Ëmwelt, Klima a nohalteg Entwécklung schafft esou vill wéi méiglech a Richtung vun nohaltege Léisungen a wëll dofir prioritär déi Léisunge fördern déi Méiwee-Benutzungen erméiglechen. D'Wiel vun der Verpackung a vum Material soll virun allem no där Prioritéit gemaach ginn. Unerkannten Démarche wéi déi vum Life Cycle Assessment ginn an dësem Beräich bevirdeelegt fir dat gönschtegste Material eraus ze sichen.

Wann et ëm Eeweeepakunge geet, ass de Wëlle vun der Regierung d'Quantitéiten u Verpackungen am globale Sënn ze reduzéieren, an dorënner fale besonnesch d'Plastikverpackungen (mee net nëmmen).

Iwwert déi rezent publizéiert Directive (UE) 2019/904 betreffend den Impakt vun eenzelne Plastikproduiten op d'Ëmwelt wäerten eng Rei vun Eeweartikele verbuede ginn. Anerer, an do drënner falen och verschidde Plastikverpakungen, mussen reduzéiert ginn. D'Regierung wäert iwwerpräiwen a wéi wäit et méiglech a sënnavoll ass iwwert d'EU-Legislatioun eraus ze goen fir och Verpakungen oder aner Plastikproduiten ze verbidden

Donieft ginn awer och d'Méiglechkeete vu verschidde finanzielle Mesuren opgegraff.

Dorënner fällt d'Ecomodulatioun vun de Contributiounen déi e Produzent muss bei der Valorlux bezuelen. Dat ass d'Méiglechkeet, d'Contributioun no festgesatene Critèren z'erhéijen, wann eenzel Critèren ongënschteg fir d'Offallproduktioun an d'Ressourceschounung sinn. Am Géigendeel gëtt dee Produzent mat enger méi niddereger Contributioun belount, wann Critère méi ëmweltgënschteg sinn. Zum Beispill kann d'Wiel vum Material fir eng Verpackung esou e Critère sinn, deemno wéi eng Materialien besser kënnen recycléiert ginn. Esou eng Ecomodulatioun ass schonn haut am Agrément vun der Valorlux virgesinn, a gëtt nei iwwerschaaft a verstärkt am Kader vun der Ëmsetzung vun der neier Offalldirektiv 2018/851/EC, respektiv dem Iwwerschaafte vun dem Gesetz iwwert d'Verpackungsoffäll.

Pfand ass en aneren Ustouss deen dozou bäidroen kann, méi eng Ressourcenschounend Verpackungspolitik ze maachen. Wann de Pfand agefouert gëtt, ass dat an deem Sënn en Ureiz fir d'Produzenten well se deemno wéi da keng Contributioun méi brauchen ze bezuelen. Mat de Méiglechkeete fir Pfand anzeféieren an den noutwennege Modalitéite wäert de Ministère sech och befaassen. Eng besonnesch Opmierksamkeet gëllt der spezieller Situatioun hei am Land vis-à-vis vun der oppener Économie, dëst besonnesch am Kontext vun engersäits de villen Exporter vu Gedrénks dat hei verkaaft gëtt, an anersäits dem méiglechen Import vun eidele Verpakungen fir déi zu Lëtzebuerg kee Pfand bezuelt ginn ass.

D'Belounung vun de Bierger déi sech aktiv un enger besserer Ressourcegestioun bedeelegen, ass en Thema wat och an dem Coalitionsaccord dra steet an un deem d'Regierung wäert schaffen. Hei gelt et virun allem déi richteg Viraussetzungen ze schafen, déi esou e Belounungssystem erméiglechen.

Ausser deene finanziellen Incentives gëllt och d'Sensibiliséierung vun deene verschiddene Secteuren, wéi zum Beispill d'HORESCA, déi och soll duerchgefouert ginn. Als rezent Beispill kann een d'Dokument "Tragetaschen im HORESCA-Sektor - Alternativen zu Einwegtüten im HORESCA-Sektor" (März 2019) an déi passend Bewertungsfichen ernimmen. Dës Aarbecht gëtt och weider gefouert.

Et sief och dozou gesot datt de Ministère vill mat de Secteuren zesummeschaaft, fir ëmmer di méiglechste pragmatesch an akzeptabel Léisungen z'entwéckelen.

Wat d'Offer am Allgemenge betrëfft, sou ass ze betounen, dass déi Betriber, déi mat R&D Projeten probéieren ëmweltfrëndlech Verpakungen ze entwéckelen, d'Méiglechkeet hunn vum Staat finanziell ënnert d'Äerm gegraff ze kréien.

Parallel dozou kënnen och déi Betriber an de Genoss vun enger finanzieller Ënnerstëtzung kommen, déi eng grondleeënd Ännerung vun hirer Produktioun duerchféieren an dobäi

eventuell och hir Approche vun de Verpackungen komplett iwwerschaffen. An deem Kontext ass ze bemierken, dass de Mëttelstandsminister eng Roadshow duerch dat ganz Land am Mount Juni gemaach huet, wou hien dës Informatiounen am perséinlechen Kontakt mat net manner wéi 600 Betriber matgedeelt huet.

**4) *Wa scho Plastik benotzt gëtt misst dann net kloer d'Klassifikatioun vum Plastik dropstoen?***

Dat modifizéiert Gesetz fir Verpackungen vum 21. Mäerz 2017, dat d'Directive 64/62/CE ëmsetzt, präziséiert a sengem Artikel 10 datt d'Klassifikatioun vum oder vun de Materialie vun enger Verpackung däerf dropstoen. An hirer modifizierter Versioun vum 30. Mee 2018 steet an der Verpackungsdirektiv 64/62/EC, am Artikel 8, datt déi Klassifikatioun muss op der Verpackung dropstoen. Dësen Artikel wäert an der Ëmsetzung vun dëser Direktiv mat iwwerholl ginn.

**5) *Wéi eng Initiative si virgesinn, fir och d'Geschäfte derzou ze bewegen ob di eenzel Plastikverpackunge vun Uebst, Geméis a Kaffiskichelcher ze verzichten, an Alternativen unzebidden?***

Déi Initiativen déi virdru genannt goufen betreffen och dës Zort vu Verpackungen.

Donieft sinn de Moment Gespréicher mat dem Handel am Gaang fir datt am Verkaf bei den Théiken och Méiweeboxen benotzt ginn, respektiv de Client sech Dëppercher vun doheem matbréngen kann fir se dann am Buttik gefëllt ze kréien.